

- सुप्रीम कोर्ट देश मांय बच्चां री तस्करी ऊं जुड़्या अपराधां री रोकथाम अर बेगी सुणवाई सारु करड़ा दिशा-निर्देश जारी कीनां
- प्रवर्तन निदेशालय-ईडी देश मांय 15 ऊं बत्ती ठौड़ां छापा मार्या-जयपुर मांय राज्य रा पैली वाळा मंत्री प्रताप सिंह खाचरियावास रा रेहवास माथे ई तलाशी लीरीजी
- राज्यपाल हरिभाऊ बागडे नौजवानां रा कौशल विकास माथे जोर दीनो-बीकानेर मांय राजस्थान पशु विज्ञान अर पशु चिकित्सा विश्वविद्यालय रा 8वां दीक्षांत समारोह ने संबोधित कीनां
- प्रदेश मांय ओजू तेज गर्मी अर लू रो दौर सारु व्ह्यो

000

सुप्रीम कोर्ट देश मांय बच्चां री तस्करी ऊं जुड़्या अपराधां री रोकथाम अर ऐड़ा मामलां री बेगी सुणवाई बाबत् करड़ा दिशा-निर्देश जारी कीना हैं अदालत उत्तर प्रदेश रा बाल तस्करी मामला मांय आरोपितां री ओर ऊं दायर अग्रिम जमानत री अर्जियां माथे आज सुणवाई करता थकां अ हुकम दीनां न्यायमूर्ति जे.बी. पारदीवाला अर आर महादेवन री पीठ देश री न्यारी-न्यारी हाईकोर्टां ने नीचली अदालतां ने बाल तस्करी रा मामलां री सुणवाई छह महीना री मियाद मांय पूरी करण रा हुकम देवण बाबत् कह्यो सुप्रीम कोर्ट ऐड़ा मामलां री सुणवाई रोजीना करण सारु ई कह्यो एक ओर खास निर्देश मांय सर्वोच्च न्यायालय अस्पताल ऊं नुवा जन्म्या बच्चा रे चोरी व्हे जावण री सूरत मांय संबंधित अस्पताल रो लाइसेंस रद्द करण सारु ई कह्यो

000

प्रवर्तन निदेशालय-ईडी री टीमां आज जयपुर समेत देशभर मांय 19 ठौड़ां कार्यवाही कीनीं ईडी री टीम जयपुर मांय राज्य रा पैली वाळा मंत्री प्रताप सिंह खाचरियावास रा रेहवास री तलाशी लीनीं रियल एस्टेट हलका मांय निवेश करण वाळी एक कंपनी मांय 48 हजार करोड़ रुपया रा घोटाला री शंका ऊं जुड़्या मामला मांय आ कार्यवाही करी ज्यो श्री खाचरियावास रा रहवास माथे ई.डी. री कार्यवाही री जाणकारी मिलता ई वां रा हिमायती लोग मोटी तादाद मांय मौके पूग र कार्रवाई रो विरोध कीनो अर सरकार रे खिलाफ नारा लगायां हालात ने ध्यान राखता थकां मौका माथे तीन पुलिस थाणां रो जाब्तो लगायी ज्यो ई दौरान खाचरियावास खुद घर ऊं बाहर निकळ र लोगां ने समझायां खबरनवीसां सागे बातचीत करता थकां श्री खाचरियावास कह्यो के वां रो किण ई कंपनी ऊं कोई लेन-देन नी हैं

000

केन्द्रीय गृहमंत्री अमित शाह रो 17 अप्रैल ने सिरोही जिला रा आबू रोड मांय विश्व एकता और विश्वास के लिए राजयोग मुद्दा माथे राख्या जावण वाळा राष्ट्रीय सम्मेलन रो उद्घाटन करण रो कार्यक्रम हैं चार दिन रो राष्ट्रीय सम्मेलन ब्रह्मकुमारी संस्थान रा अंतर्राष्ट्रीय मुख्यालय शांतिवन मांय राख्यो जावेलां इण मांय फौज रा तीन ई अंगां रा अहलकार, जवान, आई.टी.बी.पी., सी.आर.एफ अर सी.आई.एस.एफ. रा जवान सिरकत करेलां

सम्मेलन मांय ध्यान अर योग री सिखावण दी जावेलां श्री शाह रो सम्मेलन रा उद्घाटन पाछे फौज अर दूजा हिफाजती दस्तां रा अहलकारां ने सम्बोधित करण रो कार्यक्रम हैं वे संस्थान री लारला दिनां देवलोक व्ही मुख्य प्रशासिका दादी रतनमोहिनी ने श्रद्धाजंलि ई देवेला अर नुवी मुख्य प्रशासिका बी.के. मोहिनी दीदी अर अतिरिक्त मुख्य प्रशासिका बी.के. मुन्नी दीदी रो मान करेलां गृहमंत्री रा दौरा री तैयारियां रो आज ए.डी.एम. डॉ. दिनेश राय सापेला अर ए.एस.पी. प्रभु दयाल

जायजो लीनो अर अहलकारां ने शांतिवन मांय हिफाजती इन्तजामात तैय करण ऊं जुड़्या जरूरी हुकम दीनां

000

केंद्रीय कपड़ा मंत्री गिरिराज सिंह आज भीलवाड़ा मांय टैक्सटाइल ट्रेड फेडरेशन रो नुवो भवन जनता ने सूप्यों ई मौके श्री सिंह कह्यो के देश मांय कपड़ा उद्योग मांय नौकरी-धंधा रा मोकळा मौका मिल रह्या हैं

000

केन्द्रीय कानून अर न्याय अर संसदीय कार्य मंत्री अर्जुन राम मेघवाल आज चूरु जिला मांय सुजानगढ़ रा ठरड़ा मांय सुक्ष्म आरोग्य विहार अस्पताल रा काम री नींव रखीं ई मौके श्री मेघवाल कह्यो के भामाशाह परिवार री ओर ऊं बणाया जा रह्या ई अस्पताल ऊं हलका री जनता ने फायदो मिलेलां कार्यक्रम मांय नगरीय विकास अर स्वायत्त शासन मंत्री झाबर सिंह खर्वा अर राज्य रा पैली वाळा मंत्री राजेन्द्र राठौड़ ई मौजूद रह्यां

000

राज्यपाल हरिभाऊ बागड़े नौजवानां रा कौशल विकास माथे जोर दीनो हैं वे आज बीकानेर मांय राजस्थान पशु विज्ञान अर पशु चिकित्सा विश्वविद्यालय रा 8वां दीक्षांत समारोह मांय बोल रह्या हां श्री बागड़े कह्यो के गुरुकुल मांय भणार्ई-लिखाई रे दौरान विद्यार्थियां ने शिक्षा सागे कौशल विकास अर चरित्र निर्माण री सीख ई मिलती हीं राज्यपाल शिक्षा अर डिग्री हासिल करण सागे खेल-कूद अर कसरत करण बाबत् कह्यो वे विद्यार्थियां ऊं गुरु-दक्षिणा रा तौर ऊं विश्वविद्यालय परिसर मांय एक-एक पौधो रोप र वां री सार-संभाळ करण सारू ई कह्यो राज्यपाल विश्वविद्यालय मांय बणाया जावण वाळा अरुंधति कन्या छात्रावास रा काम री नींव रखीं ई काम माथे करीब दो करोड़ रूप्या रो खर्च आवेलां कार्यक्रम मांय पशुपालन, गौपालन, डेयरी अर देवस्थान मंत्री जोराराम कुमावत ई मौजूद रह्यां दीक्षांत समारोह मांय 433 विद्यार्थियां ने स्नातक, 71 ने स्नातकोत्तर अर 11 जणां ने पी.एच.डी. री उपाधियां दे र नवाजी ज्या अर 10 होशियार विद्यार्थियां रो न्यारा-न्यारा तमगा दे र मान करी ज्यो

000

जगद्गुरु रामानंदाचार्य राजस्थान संस्कृत विश्वविद्यालय रो 7वां दीक्षांत समारोह 17 अप्रैल ने राख्यो जावेलां विश्वविद्यालय रा कुलपति प्रो. रामसेवक दुबे आज खबरनवीसां ने आ जाणकारी दीनीं

000

राजस्थान पुलिस स्थापना दिवस रा सिलसिला मांय आज प्रदेशभर मांय न्यारा-न्यारा कार्यक्रम राख्यी ज्यां बांसवाड़ा मांय विद्यार्थियां सारू सवाल जवाब री होड़ राख्यी ज्यी अर स्कूली विद्यार्थियां ने पुलिस थाणा रो दौरा करायी ज्यो ई मौके पुलिस वाळा योगाभ्यास कीनो अर पुलिस रा अहलकारां री ओर ऊं खूनदान शिविर लगायी ज्यो पुलिस लाइन मांय पौधा ई रोपी ज्यां चित्तौड़गढ़ मांय पुलिस री ओर ऊं पर्यावरण ने बचावण, जन सेवा करण अर सामाजिक जिम्मेदारी निभावण रा संदेश देता थकां न्यारा-न्यारा कार्यक्रम राख्यी ज्यां आज साफ-सफाई रो अभियान चलायी ज्यो, खूनदान शिविर लगायी ज्यो अर पौधा रोपी ज्यां

000

कृषि मंत्री डॉ. किरोड़ी लाल मीणा आज सवाईमाधोपुर जिला रा मलारना डूंगर मांय 'मंत्री आपके द्वार' कार्यक्रम रा तहत जनसुणवाई कीनीं ई दौरान कृषि मंत्री जनता री समस्यावां सुण र अहलकारां ने जरूरी हुकम दीनां

000

प्रदेश मांय तेज गर्मी अर लू रो दौर ओजू सरू व्हे ग्यो हैं लारला 24 घंटां मांय राज्य मांय पारो चढ्यो जैसलमेर, बाड़मेर अर बीकानेर समेत आतूणी हलकां मांय जोरदार तावड़ो पड़ रह्यो हैं केई ठौड़ां रात री बगत ई तापमान 25 डिग्री सेल्सियस रे पार निकळ ग्यो बीती रात फलौदी, बीकानेर अर बाड़मेर मांय रात री बगत ई पारो 28 डिग्री सेल्सियस ने पार कर ग्यो म्हाणा बाड़मेर खबरनवीस बतायो के जबरदस्त तावड़ा रे कारण जिन्दगी माथे घणो असर पड़ रह्यो हैं

.....

फलौदी जिला मांय ई पड़ रही जोरदार गर्मी ऊं घणी परेशानी व्हे रही हैं

.....
कोटा, चित्तौड़गढ़, जैसलमेर अर डूंगरपुर समेत केई ठौड़ां रात री बगत तापमान 26 डिग्री सेलियस
ऊं ऊंचो दर्ज करी ज्यों मौसम विभाग आवता तीन—चार दिन मांय ज़बरदस्त तावड़ो पड़बा रा
आसार जताया हैं

000

पोषण पखवाड़ा रा तैत आज डूंगरपुर ज़िला मांय सीमलवाड़ा रा बांसिया मांय खास कार्यक्रम राख्यी
ज्यों अभियान रा ब्लॉक समन्वयक कौशल कुमार कलाल बतायो के नान्हा टाबरां री ज़िन्दगी रा
पहला एक हज़ार दिनां माथे खास ध्यान देवणो ज़रूरी हैं वे पोषण ट्रैकर मांय लाभार्थी मॉड्यूल अर
ब्डंड मॉड्यूल रे ज़रिए कुपोषण प्रबंधन माथे ज़ोर दीनों कार्यक्रम रे दौरान पौष्टिक खाण—पीण अर
हरी पत्तेदार सब्जियां री प्रदर्शनी ई लगायी ज्यों

000